



Ørjan Gangstø har vore på Børnes med eitt nytt lass

Skogbruket har vind i segla på Vestlandet - så også i Kvinnherad. Eit anslag for det tømmeret som akkurat no ligg på Børneskaia i Uskedalen understrekar det.

Tømmertransportør Ørjan Gangstø antar at det er rundt rekna 1.200 kubikkmeter og virket kjem frå heile kommunen. Men det har vore lagra like mykje der før.

Gangstø Transport i Vindafjord har køyrt tømmer til Børnes sidan 1990-talet og er i aktivitet i heile Hordaland og halve Rogaland. Ørjan er svært fornøgd med utviklinga i det siste.

Særleg på Kaldestad i Husnes og i Omvikdalen har det vore store drifter i det siste, men også i Åkra blir det avvirka ein god del. Akkurat no blir det ikkje hogge i Uskedalen.

Vestskog hadde eitt svært godt år i fjor og spørsmålet er om dette året blir like oppløftande, I 2010 enda skogeigarlaget på rekorden 150.000 kubikk etter ein auke på 38 prosent og to tredelar vart hogge i Hordaland.

Ullensvang og Voss toppa statistikken i vårt fylke, men Kvinnherad låg også brukbart an.

Tekst og foto: Ola Matti Mathisen